

LIPOK

1 Tetenzük nung Tsüngremi anüing* aser alima poktetdaksü. ²Aser alima kecha mekümteti aser tazünga liasü, aser am-mang tzüyim manung liasü, aser Tsüngremi tanela tzü manung liasü: aser Tsüngremi tanela tzü manung moka liasü. ³Aser Tsüngremi ashi, Tesangwa liang; aser tesangwa liasü. ⁴Tsüngremi tesangwaji junger ta ajitet; aser Tsüngremi am-mang nungi tesangwa lemdang. ⁵Aser Tsüngremi tesangwa dang Anogo ta aja, aser am-mang dang pai Aonung ta aja. Aser aonung o anepdang naji, anogo mezüngbuba liasü.

6 Aser Tsüngremi ashi, Tzü tom nung lungtena kümang, aser iba jagi tzü nungi tzü lemsadakjang. ⁷Aser Tsüngremi lungtenbaji yanglua, lungtenba tamalen aliba tzü nungi lungtenba telungen alibe tzü lemsa; aser yamaji liasü. ⁸Aser Tsüngremi telungenba dang Anüing ta aja. Aser aonung o anepdang naji, anogo tanabuba liasü.

9 Aser Tsüngremi ashi, Anüing kübok aliba tzü tesem ka nung sentenang, aser ali takong adokang; aser yamaji liasü. ¹⁰Aser Tsüngremi ali takong dang Alima ta aja; aser tzü sentenba dang pai Tzüyim ta aja: aser Tsüngremi aji junger ta ajitet. ¹¹Aser Tsüngremi ashi, Alimai rem o, metsü atangba süngo-lio o, tejang atangba süngdong tapu tapu shia süngiang atangba, kechi nung pai pei metsü jang lir, aji alima nung adokdakjang; aser yamaji liasü. ¹²Aser ali jagi reh o, metsü tapu shia atangba süngo-lio o, tejang atangba süngdong, tapu tapu shia tejang kechi nung pei pei metsü jang lir, aji adokdaksü aser Tsüngremi aji junger ta ajitet. ¹³Aser aonung o anepdang naji, anogo tasembuba liasü.

14 Aser Tsüngremi ashi, Anüing lung-

tenba nungji aonung nungi anogo lemdangtsü asoshi tesangwatem lidakjang; aser item temaitsü asoshi, aser tsüngkem mungpu asoshi aser anogo aser küm asoshi sang; ¹⁵aser alima nung sangwatsü asoshi item anüing lungtenba nung tesangwa liang: aser yamaji liasü. ¹⁶Aser Tsüngremi tesangwa sangwatsü, aser tilabaji aonung sangwatsü asoshi; ano pai petinutema yanglu. ¹⁷Aser Tsüngremi alima nung sangwatsü asoshi, ¹⁸aser anogo aser aonung kibur akümtsü, aser am-mang nungi tesangwa lemdangtsü asoshi, item anüing lungtenba nung yutsü: aser Tsüngremi aji junger ta ajitet. ¹⁹Aser aonung o anepdang naji, anogo pezübuba liasü.

20 Aser Tsüngremi ashi, Tzü nung taküm shiruru telok agi sünga liang, aser ozütem ali temalen anüing tom nung yimzüang. ²¹Aser Tsüngremi tzüyim shiruru tulutemji, aser arakzüba taküm shiruru ajak, kechi tzü nung nungzüa liasü, tapu tapu aser tashikang aketba ozü ajak tapu tapu poktetdaksü: aser Tsüngremi aji junger ta ajitet. ²²Aser Tsüngremi parnok moaja ashi, Tejang rena tangang, aser kümang aser tzüyim nung tzüji süngiang, aser alima nung ozütem rendakjang. ²³Aser aonung o anepdang naji, anogo pungububa liasü.

24 Aser Tsüngremi ashi, Alima nung taküm shiruru pei tapu tapu, kiset shiruru, ali nung ayazüba, aser alima shiruru pei tapu tapu adokdakjang; aser yamaji liasü. ²⁵Aser Tsüngremi alima shiruru pei tapu tapu, aser kiset shiruru pei tapu tapu, aser ali nung ayazüba kechisarena pei tapu tapu yanglu: aser Tsüngremi aji junger ta ajitet. ²⁶Aser Tsüngremi ashi, Asenoki nisung asen ama, asen mesükba nung yangludi: aser tzüyim ango madak aser anüing ozü madak, aser kiset shiruru madak aser alima

*Kodang Tsungremi yanglutsu tenzük.

ajak madak, aser ali nung ayazüba ajak madak parnok kibur sang. ²⁷Aser Tsüngremi pei ama nisung poktetdaksü, Tsüngrem mesükba nung pai pa poktetdaksü; tebur aser tetsür pai parnok poktetdaksü. ²⁸Aser Tsüngremi parnok moatsü: aser Tsüngremi parnok dang ashi, Soyapokyaang, aser jenti renang, aser alima süngdakja aji azüokang; aser tzüym ango madak, aser anüing ozü madak, aser alima nung arakzüba taküm aliba kechisarena madak, kibur sang. ²⁹Aser Tsüngremi ashi, Ajiang, alima ajak nung aliba metsü atangba süngo-lio ajak aser süngdong ajak kechi nung metsü jang atangba süngjang lir, ni nenok nem agütsür: nenok asoshi aji chiyungtsü alitsü. ³⁰Aser alima shiruru ajak nem, aser anüing ozü ajak nem aser ali nung ayazüa aoba ajak nem kechi nung taküm lir, ni sünglio tajem chiyungtsü asoshi agütsür; aser yamaji liasü. ³¹Aser Tsüngremi pai yangluba ajak angu, aser ajiang, ya kanga junger liasü. Aser aonung o anepdang naji, anogo trokbuba liasü.

2 Yamaji anüing o, alima o, aser parnok telok renem. ²Aser tenetnübuba nung Tsüngremi pai yangluba mapa atem; aser tenetnübuba nung pai yangluba mapa ajak nungi pai mungzük. ³Aser Tsüngremi anogo tenetbubaji moaja meshitet; kechiaser iba nung pei mapa ajak nungi, kechi Tsüngremi pokteta yanglu, pai mungzük.

4 Itemi anüing ali putu, kodang parnok poktetdaksü koba anogo nung KIBUBA Tsüngremi alima aser anüing poktetdaksü. ⁵Aser alima nung ano süngdonglidong maliasü, aser sungo-lio ano memeku; kechiaser KIBUBA Tsüngremi alima nung ano tsünglu marudaksü, aser ali inyaksü nisung kata maliasü; ⁶saka tzsü alima nungi tua ali jak metendaksü. ⁷Aser KIBUBA Tsüngremi ali agi nisung yanglu, aser pa teni nung taküm tangula apuoktsü, aser nisungji akümlir ka aküm.

⁸Aser KIBUBA Tsüngremi anüdoklen atsüki ka Eden nung yanglu; aser idakji pai peii yangluba nisung toktsü. ⁹Aser ali nungi KIBUBA Tsüngremi tenükdang tajinütsü aser chiyungtsü asoshi tajung süngdong ajak meidaksü; taküm süngdonga atsüki tiyong nung, aser tajung o tamajung metetba süngdong pai meidaksü. ¹⁰Aser ayong ka atsüki metena ayimtsü asoshi Eden nungi tugu; aser idak nungjagi aji lemsaa ayong pezü aküm. ¹¹Mezüngbuba tenüing Pison; iba jagi hon aliba Habila lima ajak meketbanger; ¹²aser iba lima honji tajung; aser idakji dellium aser oniks lung lir. ¹³Aser ayong tanabuba tenüing Gihon; iba jagi Kush lima ajak meketbanger. ¹⁴Aser tasembuba ayong tenüingji Hidekel: ibaji Asiria anüdoklen ayimer. Aser pezübuba ayongji Eufates. ¹⁵Aser KIBUBA Tsüngremi nisungji ania arua pa Eden atsüki inyaksü aser anüktü toktsü. ¹⁶Aser KIBUBA Tsüngremi nisung dangji melaa ashi, Atsüki süngdong ajak nungi nai odang chitet: ¹⁷saka tajung o tamajung metetba süngdong nungi nai techi; kechiaser nai koba anogo nung iba nungjagi chidir na atangji asütsü.

18 Aser KIBUBA Tsüngremi ashi, nisungji kija alitsü majung; ni pa asoshi teyarir tetemsü ka yangludi. ¹⁹Aser ali agi KIBUBA Tsüngremi arem shiruru ajak aser anüing ozü ajak yanglur pai kechi tenüing sa jadiri ta nisung dang jagi anir aru; aser nisung jagi taküm shiruru shia dang kechi aja, aji pa tenüing aküm. ²⁰Aser nisungjagi kiset shiruru ajak nem, aser anüing ozü ajak nem, aser arem shiruru ajak nem tenüing agütsü, saka nisung asoshi teyarir tetemsü ka mangu. ²¹Aser KIBUBA Tsüngremi sümanga mejangba nisung dakji adokdaksü, aser pa mejanga ao; aser pai pa tesaret ka agiteta aji melena shi mejembangtsü. ²²aser tesaret, koba KIBUBA Tsüngremi nisung dak nungi agiteta, iba jagi pai tetzür ka yanglu

aser la nisung dangi anir ao. ²³Aser nisung jagi ashi, Ibai tang kü teret nungi teret, aser kü shi nungi shi: la dang Tetsür ta ajatsü, kechiaser la Tebur nungi agitet. ²⁴Anungji nisungi pei tebu aser pei tetsü toktsür, pei kinungtsü den sentepa alitsü; aser tena shi ka dang alitsü. ²⁵Aser tena prungla mangsa liasü, nisung o pa kinungtsü na, aser maktepi liasü.

3 Tang KIBUBA Tsüngremi yangluba arem shiruru ajak dang per tesangraba liasü. Pai tetsürla dang ashi Atangji, atsüki aliba süngdong kecha nungi techi ta Tsüngremi ashi asü? ²Aser tetsürlai per dang ashi, Atsüki aliba sungjang onoki chitet; ³saka koba süngdong atsü tiyong nung lir, iba süngjang techi aser tekongshi, aji mesüra ashiko nenok asütsü, ta Tsüngremi ashi. ⁴Saka peri tetsürla dang ashi, Atangji nenok masütsü: ⁵kechiaser kechi anogo nung nenoki ibai chidir idangyongji nenok tenük lapoka, nenok Tsüngremi ama, tajung tamajung akümtsü ta Tsüngremi metet. ⁶Idangji tetsürlai iba süngdongji tachitsü asoshi tajung, aser tenük dang azüapungtsü, aser shisatsü kaa kümdaktsütsüsa süngdongji apayua, lai iba süngjang ongzüka achi; aser lai kinungpu nema agütsü aser pai achi. ⁷Aser tenaprungla tenük lapok, aser parnok mangsa ta meteta aküm; aser parnoki mungu o arütep aser pei asoshi teperem sü yanglu. ⁸Aser KIBUBA Tsüngremi anogo mopung tanepdang atsüki nung jajaba ola parnoki angashi; anungji nisungba o tebutzü na KIBUBA Tsüngremi süngdong nungi atsüka atsüki süngdong rongnung ali. ⁹Saka KIBUBA Tsüngremi nisung dang jaa ashi, Na kong ali? ¹⁰Aser pai ashi, Ni atsüki nüng ne ola angashir, ni mangsa asü nung tsübuwa atsüka ali. ¹¹Angji KIBUBA Tsüngremi ashi, Ne mangsa ta ne dang shibai ashi? Ni ne dang kechi süngdong nungi techi ta ashi aji nai achi asü?

¹²Idangji nisungjagi ashi, Koba tetsür nai kü den alitsü agütsü, lai iba süngdong nungi ku nem agütsü, aser in achi. ¹³Idangji KIBUBA Tsüngremi tetsürla dang ashi, Nai ya kechi inyak? Tetsürlai ashi, Peri ni kelakoktsü, aser ni achi. ¹⁴Angji KIBUBA Tsüngremi per dang ashi, Nai ya inyak nungji, kiset shiruru ajak aser arem shiruru ajak dang taoba na atakatem kaotsü; tepok agi na juzütsü aser ne arishi tepiyong aoyi achitsü. ¹⁵Aser ni na o tetsür na yongtsü nung, aser ne kidong o lar kidong na yongtsü nung tsükchitep yutsütsü: pai ne kolak ajemsatsütsü, aser nai pa shibalang yirutsütsü, ¹⁶Pai tetsür dang ashi, Ni na nubenba timtem tali kümdaktsütsü; na kangshia tanur amungtsü, aji saka ne azüapungba ne kinungpu dak alitsü, aser pa ne madak kibur akümtsü. ¹⁷Aser Adam dang pai ashi, Kechi süngdong nungi ni ne dang techi ta ashi, aji nai ne kinungtsü o angar achi nung, na atema ali nung atakatem kaor. Ne arishi tepiyong angnungji belemseta chiyungtsü angutsü: ¹⁸ayi aser ai iba jagi ne dang meitsütsü; aser nai arem nung meiba süngo-lío achitsü. ¹⁹Na meyipa ali maküm tashi, pei tejak nungi asentsü yima chiyungtsü angutsü; kechiyong na ali nungi agitet; kechiaser na ali lir, aser tanaben ali kuma aotsü. ²⁰Aser nisungjagi pei kinungtsü tenüng Eva ta aja; kechiaser la akümlir ajak tetzü. ²¹Aser KIBUBA Tsüngremi Adam aser pa kinungtsü asoshi shikep tola yanglua parnok nem semtsü.

²²Aser KIBUBA Tsüngremi ashi, A-jiang, nisungji asenok rongnung ka ama, tajung tamajung meteta, kümogo; ashiko pai tang teka songtoka taküm süngdong ongzüka chir teti taküm alitsü. ²³Anungji KIBUBA Tsüngremi kechi li nungi pa agitet, iba li tudaktsütsü asoshi pa Eden tsüki nungi odaktsü. ²⁴Yamaji pai nisungji aridok; aser taküm süngdong le-mang anüktu, Eden tsüki anüdoklen Cherubim, aser ajaklen meyipshiba sent-

süprang nok ka ayu.

THE HOLY BIBLE

Ao Naga (Re-edited)
1981

1,000 Copies--83



The Bible Society of India
20 Mahatma Gandhi Road
Bangalore

Available at
Bible House, Students' Field
Shillong 793002